

Prome encuentro cu bisiñanan di Isla di Oro ta positivo y productivo

Treciendo ideanan hunto y desmintiendo rumornan



CU E PROPOSITO di mantene un comunicacion habri entre desaroyador y habitantenan rond di proyecto Isla di Oro, a tene recientemente un encuentro caminda a trece dilanti e ultimo avancen.

Aki bisiña directo di e area tabatin oportunidad di tende stret for di boca di esnan encarga di control di plaga, seguridad y naturalmente e construccion di e boutique hotel riba su mes. Habitantenan tabata contento di por a duna nan comentario y haci pregunta pa haya contestanan di biaha y concreto.

Na mesun momento, e encuentro a sirbi pa aclaria rumornan robes purbando di lanta cabes.

Isla di Oro lo ta un proyecto unico den su estilo p'e region Caribense y cu un potencial enorme. Grupo Isla ta compronde totalmente e preocupacion cu tin pa mantene e flora y fauna di e area en cuestion.

Pesey mes, un prioridad ta pa cumpli cu e rekisitonan internacional pa cu proteccion di medio ambiente, segun e prestigioso programa di certificacion LEED.

Estudionan di impacto ambiental ta den proceso y ta trahando cu diferente compania local, y mihor ainda, di Pos Chikito mes, pa

atende e diferente retonan.

E proyecto ta consisti di 62 bungalows traha cu material natural den un proceso di construccion cu tin un impacto minimo.

E concepto di 'Endless Privileges' di Zoetry ta consisti di un combinacion di servicio den cual ta envolucra companianan local di car rental y tours.

Tambe tin un Dine Around Program den cual e restaurantnan di e area di Spaans Lagoen, Pos Chikito y Savaneta ta bay forma parti di dje. Fuera di esey, e restaurant den e propiedad ta bay ta habri pa mercado turistico den su totalidad y publico local en general.

E intencion di parti di e esnan encarga cu e proyecto ta pa sigui traha di serca cu e habitantenan p'asina yega n'e mihor producto final posibel pa ambos partido.

Di mesun manera, e compania ta den comunicacion cu instancia publico y fundacionnan local cu ta regarda cu maneho di



medio ambiente pa percura cu e preocupacion y recomendacion di cada un ta haya su debido oido den e ehecucion di e proyecto.

E reunion aki t'e prome di mas cu tin programa den e proximo lunanan p'asina sigui tene un y tur na altura di kico ta pasando y kico ta bay haci.

E reaccion di parti di e bisiñanan tabata uno di gran interes, pero tambe sumamente positivo. Tabatin preguntanan, pero tambe sugerencianan valioso cu ta bay tuma den consideracion. E grupo aki di bisiña ta contento di mira cu finalmente tin un luz den horizonte p'e bario di Pos Chikito y cu ta un iniciativa cu ta beneficia no solamente nan como habitante, pero tambe comercio den e area y Aruba en general.